



ILINNIARTITSISUNUT MALITTARISASSAQ

Ilinniartitsissummut "Tarnip qupineri"

Saqqummersitsineq pillugu

Eqqumiitsuliat allaanerusunik periarfissiisinnaapput – eqqarsartitsilersinnaapput, ulluinnarnik allanngortisisinnaapput mumisitsisinnaallutilu.

Gukki Nuka saqqummersitaminik "Tarnip qupineri" sunneerusuppoq. Eqqumiitsuliat tamarmik ullorsiutimisut suliaralugit aallartissimavai, misigisimasaminik sakkortuumik, tassa meeraalluni kinguaassiutitigut atornerlugaasimanerminik suliarinninnerminut atatillugit.

Misiginikuusimasai misigissutsillu takkukkaangata eqqumiitsuliat pinngortarsimapput. Suliarinninnissaminut atortorisaa qaninnerpaaq tassaasimavoq oqarasuaat angallattagaq. Inussaminik oqarasuaatiminut titartaanermini eqqumiitsuliat saqqummersitsinermiittut pinngortissimavai. Taamatut suliaqarnermini eqqumiitsuliat katillugit 1000-it missai pinngortissimavai. Ilaannai saqqummersitsinermi takuneqarsinnaapput.

Eqqumiitsuliani pillugit Gukki Nuka ima oqaaseqarpoq:

"Eqqumiitsulianni inersimasutut timera atorpara, 14-nik ukiulittuunngitsoq, isumaqarama uannut pitsaanerpaasoq anniarneq, iloriusissaaleqineq, kamanneq, aliasunneq aammalu naggataatigut oqaluttuarnissannik saperunnaarsimanagera ullumikkut kinaassuserilersimasara atorlugu takutittuugukkit. Inuk ajortorsuarmik misigisaqarsimasoq ullumikkut illuatungaanut pisimavoq, aatsaat taama nukittutigaluni."

Eqqumiitsuliortoq pillugu

Gukki Nuka (in. 1965) inuusuttuunerminili eqqumiitsuliorneq pimoorullugu aallutarisimavaa, Nuummi eqqumiitsuliornermik ilinniarfimmi ilinniarsimasuulluni, Woodland Institutemilu Canadamiittumi ilinniarsimasuulluni, marralerineq pingaarnertut sammisaralugu. Eqqumiitsuliaani tamani malunnarpoq eqqumiitsuliani suliareqqissaartarai, kukkuneqartinnagit, sukutsitai tamaasa eqqarsaatigalugit. Eqqumiitsuliani asuli ilanngussuiffigineq ajorpai, inissinnerilu tamaasa suliareqqissaartarlugit. Tassuuna takuneqarsinnaavoq eqqumiitsuliornermik nalunngisaqarluarnera paasinneqqissaarsimanageralu.

Ilinniartitsissutit pillugit

Ilinniartitsissutit eqqumiitsuliornermi assinillu misissueqqissaarnermut (billedanalyse) tunngapput, atuartut namminneq eqqumiitsulianik misissuititsinnissaat namminnerlu oqaasilersuinissaat qitiutinneqarluni. Suliassat tallimaapput, eqimattakkaarnermi suliarineqartussat.

nk

NUUMMI EQQUMIITSULIANIK SAQQUMMERSITSIVIK
NUUK KUNSTMUSEUM // NUUK ART MUSEUM

Suliassat tamarmik immikkut 15 min. miss. suliassaapput. Taamaattumik eqimattat tamarmik suliassat arlallit angumerisinnaassavaat, apeqqutaalluni saqqummersitsivimmi klassip piffissaq qanoq annertutigisoq atussaneraat. Eqimattakkaarnermi oqaloqatigiinneq aamma nammineq eqqarsaatersornissaq tunngaviupput.

Aallartitsinnginneranni, saqqummersitsineq tunuliaqutaalu pillugit oqaaseqaqqaarnissaq innersuussutigineqarpoq, eqqumiitsuliat ersarissumik oqaatiginiagaqareermata. Eqimattakkaarlutik suliaqarneranni eqqartuinerannilu eqqumiitsuliamut sammiinnaavinnissaat eqqumaffigiuk. Eqqumiitsuliaq ersarissaqqissaartiguk; eqqumiitsuliaq sooq taamatut isigineraat imaluunniit sooq taamatut oqaasertalerneraat.

Suliassani atuartut namminneq eqqumiitsulianik sammisaqarnissaat oqaasilersunissaallu qitiutinneqarput. Taamaattumik suliassat tallimat naammasinerannit aamma klassimut utereernerup kingorna suliassat suli arlaqarsinnaapput. Ilinniartitsissutini klassimut utereermermi suut suliarineqarsinnaanersut siunnersuuteqarpoq.

Qisuariutigineqartut eqqarsaatigineqartullu suliarinissaat pillugit

Eqqumiitsuliat piumanngitsaaliissutaassanngillat – arlaalluunniit tunussinissamminut pisinnaatitaavoq. Atuartoq ilinniartorluunniit arlaat saqqummersitsivimmiikkusunngippat, piumaffiginagu, saqqummersitsivimmiik anillatsiinnaruk. Kingusinnerusukkut isumagiuk – qisuariarsimanera pillugu aperiuk, saqqummersitsivimmiinnerminilu misigisai pillugit aperiuk.

“Tarnip qupineri” saqqummersitsineruvoq attortiffiusinnaasoq, qullipiffiusinnaasoq, qiassamik tupiffiusinnaasoq, allanillu annernarsinnaasunik eqqaamasaqarfiusinnaasoq. Atuartut eqqarsaateqarnissaat misigissutsiminnillu suliarinnissinnaanissaannik periarfissikkit, aamma klassimut utereernerup kingorna. Saqqummersitsineq una nipangersimaannarnernik aamma paquminartinneqartunik kipisitsinissamik siunertaqarportaaq, inuusuttut nillianerat ilummuinnaq ingerlasannginniassammat, illillu inersimasuusinnaavutit tusarnaartoq, annertoqutaasorlu.

Atuartut arlaat toqqaannartumik toqqaannartumiunngitsorluunniit nakuuserfigitinnermik misigisaqarsimappat, sapiillutit atuartup ammarnissaa isumagiuk, akisussaasutullu inersimasutut/ilinniartitsisutut/meeqqerisutut isumaginninnermi suliaqartunut ingerlaqqinnissaa isumagiuk. Inuusuttut ikioriarfeeruttutut misigitinnagit, namminneq piumassusaat naapertorlugit ikiukkit.

Kinguaassiutitigut atorneerluinerit komuunimut nalunaarutigineqartarput, tassanilu inuusuttut ingerlariaqqinnissaannik ikiorneqassapput.

Saaffigineqarsinnaasut allat:

Saaffik.gl

Kinguaassiutitigut killissamik qaangiiffigineqarnikuuviit imaluunniit nalunngisaqarpiit killissamik qaangiiffigineqarsimasumik? 0- 18-nillu akornanni ukioqarpiit?

Oqarasuaat: (+299) 346011 nal. 8-16 akornanni.

Mail: saaffik@nanoq.gl

Meeqqat inuusuttullu oqarasuaataat 134

Kinaluunniit sianersinnaavoq, minnerusumik annertunerusumilluunniit oqaloqatissarsiortoq. Aamma inersimasut, inuusuttunik kinguaassiutimigut atonerlugaasunik ikuinissaminnut ikiortissarsiortut.

Ullut tamaasa nal. 19 aamma 21 akornani. Sianerit 134

Attavik 146

Kinaassutsimik taasiffiunngikkaluarluni oqarasuaatikkut siunnersuiffik, aamma ajornartoornermi saaffiginiffiusinnaasoq.

Ullut tamaasa nal. 19 aamma 21 akornani. Siarnerit 146

1899 – SMS aqutigalugu siunnersuiffik

Inersimasoq siunnersuisinnaasoq allaqatigiuk – nuna tamakkerlugu sms aqutigalugu meeqqanut inuusuttunullu siunnersuivik.

Ataasinngornermit tallimanngornermut nal. 16-18.

Klassimi saqqummersitsineq suliareqqissiuk

Allaaserinnigit

Atuartut tamarmik immikkut eqqumiitsuliat pillugit eqqarsaatigisaminnik ataavartumik allatsikkat. Suna immikkut malugiviuk/eqqaamaviuk? Saqqummersitsivimmiinninni takusatit, misigissutsitit, eqqarsaatitillu allakkit, aammattaaq eqqaamasatit, misigissutsitit eqqarsaatersuutigisimasatillu kingusinnerusukkat takkussimasut ataavartumik allakkit.

Eqqartorsiuk

Eqqunngitsuliorfigitinnerit nakuuserfigitinnerillu annertunerusinnaapput minnerullutillu. Eqqunngitusuliorfigitinnerit nakuuserfigitinnerillu qanoq nassuiarneqarsinnaapput? Suuneri klassimi ataatsimoorlusi oqaasinngortissigit. Mindmappilioritsi, brainstormerlusiluunniit. Eqqarsaatisi tamaasa allattarfissuarmut allassigit.

Gukki Nukap nakuuserfigitinneq qanoq takutinneraa atuartullu eqqartorsiuk.